

Kálag echě Paalε áténlé

Baá Filipi

Ndibned n kálag

Paalε mó aténlé mwembé míme rídé á Filipi enén kálag áde ábédé á mbwɔg. Abédé ndutul ne ayáge áde déetɔngene áde bad bémpɛe béyágté'áá. Kénéε mímén mekan mébénládtáá, Paalε ambé menyinje, ásūm-mε nlém áyāl e adúbe áde ádúbpé Yesu Krístəə.

Nzɔm eche ekəá bon Paalε átɛl enén kálag edii áságɛn bad bé Krísto bé Filipi áyāle nwōngɛn míme bēmbéé mó á pónDé eche ántōgnēnē nwōngɛn. Awédé bó nlém á abum, aláá-'ε bó aá bébê bésūm mekuu. Acháa bó aá béwōɔ asuded á yāl áde Yesuε, ésebán bémwag bán mekan mé esíí mé ekob é yāl mékamlan bó. Akamtan bó aá abé áde bédíí mod nhóg ne Krístəə ádii nsimé n Dyōb, aá Dyōb débēl-ε bébé menyinje bébé-'ε nsan ábe áde bédíí mod nhóg ne Krístəə.

Nkabtéd n kálag

Paalε alěnté, áságɛné, akánnéd-tε mwembé n Filipi 1.1-11

Paalε aá ábé á nkōɔsɛ ádii ábele Krístəə, áwé-'ε déboɔnéd mó 1.12-30

Paalε aá abé á bad bé Krísto ábê ngáne áde Krístəə 2.1-11

Paalε aá bad bé Krísto bébê á nkōɔsɛ née tintine 2.12-18

Paalε akéné Timotie bó Epafroditus 2.19-30

Paale aá mod awě adúbpé Krístəə äkobnéd á'sō
é' Dyöb 3.1-11

Paale aá mod téé áwan áte ápid mam á asóg
bwâm 3.12-21

Paale alébe bad bé Krísto 4.1-9

Paale aságnan mwembé ní Filipi 4.10-20

Melentən mé asóg 4.21-23

Paale alómmé bad melentən

¹ Mε Paale, nchoo ne Timotie, με-εé ntenle nyé enén kálag. Sédii bembəlede ábe Yesu Krístəə. Ntenle bad bé Dyöb, bad ábe bédé mod nhóg ne Yesu Krístəə ábe bédé á Filipi, nchoo ne belyəged ne bad ábe béwōngan ákeen nsón ní Dyöb á'sō.

² Nsimé ne nsan míme ríhuú ne Dyöb awēd Titée, ne Sāngú Yesu Krístəə mbê ne nyé.

Meságnen ne mekáne míme Paale

³ Nságnan Dyöb áde mbenléé, pónde téé nzé nkāmténé nyé. ⁴ Mbélé mbé menyinge pónde téé nzé nkānnad nyé moosyáál. ⁵ Mbélé mbagé nságnen áyāle nwōngen míme nyékébéé με ákal nkalan ní bwām, bootya á pónde echě nyéwógé mó, bon nyédúbe-'ε, ápe bəəb. ⁶ Ndúbpé meé Dyöb áde ábóótédé mímén nsón ní bwām áfinté echên, dékéén mó á'sō kóəh ápēen mó á asóg á Epun éche Yesu Krístəə ápéé. ⁷ Ntāngéné enén ndín e mewēmtən awóh áyāl e nyé baásyāāl áyāle nyéde με á nlém-té. Ké áde ndíí á mbwəg, ne áde ríhóbéé mam tāngene nkalan ní bwām, nhóbe meé mímén nkalan méesaá metóm, ndé mbále. Dyöb álúmté syánē moosyáál míme nsimé ngáne débenléé mó. ⁸ Dyöb áde με mbóh nén aá nlém míme ríwōhéné nyé áte, ndé melemlen ne nlém

míme Yesu Krístæ áwónné nyé. ⁹ Nkânne-'ε nén meé, edəŋge éche nyéwónné Dyöb ne éche nyéwóó ne nhóg ne aníní ébê ékag á'sō. Nkânne-'ε meé nyébíi mekan mé Dyöb, nyésōŋten-ne nhəŋlén átíntê e mekan mé bwâm ne mekan míme méesě mekan mé bwâm. ¹⁰ Nén déběł nyéěhěł mekan míme métómténé aboŋ abíi. Nén déběł nyéēsāŋ-'ε á'sō é' Dyöb, béekóbén-naá nyé awusé ké ahóg á Epun éche Krístæ ápéé ámpē. ¹¹ Nén déběł abé á bwâm ádēn áde áhúú ne Yesu Krístæ dényínnēd áyāl e mekan mé bwâm mésyāāl míme nyébēléé, ábēl boŋ Dyöb ákud ehúmé ne mekenag.

Paale aá abé á nkōŋsé ádii ábēle Krístæ, áwé-'ε débōŋnéd mó

¹² A-baányan, ndəá meé nyébíi nén bán mekan míme mébēnlédé ne me hén, ríkóó awōŋgen ábēl boŋ nkalan mí bwâm ríkanlad ríkag á'sō. ¹³ Nén ábélé sánze ésyāāl éche éŋone eyáde éche mod ambáá ne bad bémpēe bésyāāl hén, bēbíi nén bán ndé á mbwəg áyāle rídíi mbáledε awě Krístæ. ¹⁴ Abé adé rídíi-'ε á mbwəg, áwédé ekud é bad ábē bédúbpé nlém á abum, bénábpé nlém awóŋ ákal eyale é Dyöb ésebán bēbáa' dyamdyam.

¹⁵ Edé mbále nén bán bó baahóg bēwónné me kónjí, bēhede-'ε alúmed bán bédé etógnén tómaa me. Boŋ pen, bó baahóg-ke békale míme nkalan ne mewēmtēn mé bwâm. ¹⁶ Bad ábē békale mó ne mewēmtēn mé bwâm, békale mó áyāle bédáá me, bēbíi-'ε nén bán Dyöb ákwénténé aá míbê á mbwəg hén ábēl boŋ ríhōb meé nkalan mí bwâm méesaá metóm, rídé mbále. ¹⁷ Abé ábē bēwónné me kónjí béekaléé nkalan mí bwâm ne mewēmtēn

mé bwâm, békale mó âhede échab yäl chën bwëm. Bébele nê, ne mewêmtên nén bán rîwôg ndutul abé áde rídíí á mbwôg.

¹⁸ Boŋ nén déewóó'é dyam dé abel. Ayāl e mímê menzii mésyāāl, nkalanj míme Krīstāā móo békaleé, ké bébenlād mewêmtên mé bwâm, ké'ε mewêmtên mé mbéb, ákal mó. Né-óó, áyāle nê, mēbē menyinje. ¹⁹ Mēbē mbé menyinje áyāle mbíí nén meé mekáne míme nyékānnadté me ne nwōŋgen míme Edāádāŋ éche Yesu Krīstāā ébageé me, bēbēl ríkúd e'soóson. ²⁰ Nwóó nlém áte ne menyinje mésyāāl, nlyágé-'ε nlém meé méewógké e'sôn, boŋ méwōŋ e'wéd bé nlém á abum pónde ésyāāl, tanje boob, ábel boŋ kéchéé éche mbelélé ébel ehúmé éche Krīstāā ényínned, ké ndé á alonjé ké'ε nwédé. ²¹ Ne me, abé áde rídíí á alonjé ádíí ábele Krīstāā, nzé nwédé-'ε éboŋned me. ²² Nzé édé bán ndé á alonjé mēbē mbelélé nsón míme ndé etógnén. Boob-póó, meebíí'ε ped eche rítāŋgéné atéd. ²³ Mmén mekan mébe métyéémé me á'sōte, étómé me áte éche rítāŋgéné apwēd. Ndāá meé rítāde hén mbê ne Krīstāā, áyāle nén ábóó tómaa ábé á nkōŋsé wén. ²⁴ Boŋ ayāl echên, édé etógnén bán rídíí mbê á alonjé. ²⁵ Ndúbpe nén, mbíí-'ε meé mēbē mbé á alonjé, mēbē mbé-'ε ne nyé moosyāal ábel boŋ adúbe áde nyédúbpe Krīstāā ákwōge, nyébé-'ε menyinje áyāle nyédúbpe mó. ²⁶ Nén débēl abé adé mébēē ne nyé ámpē, nyēēnabé nzōm awōŋ ábe Krīstāā mekenag ayāl echēm.

²⁷ Boob-póó, abé ádēn átāŋgéné ábé ngáne Krīstāā áhóbéé áwē nkalanj mí bwâm. Nén débēl ké mpedé ányín nyé ké'ε meépede, mēbīí nén meé nyésumé

mekuu nêḡgáne mod nhóg, nyêwóó-'ε mewêmtεν mehóg âwan áte âkæ chõm éche nyédúbpé. ²⁸ Nyéebáá' bad ábe bétâḡgan nyé. Nlém ríwúu nyé á abum pón dé ésyāā. Nén délūmēd nén bán béekudté e'soóson boḡ nyéekūd. Dyõb dós-'aá átíide nímén mésyāā. ²⁹ Dyõb ábénlédé ábē e'boḡ bé nlém áwēn, saké ádúbe Krístæ dēmpen, boḡ káḡḡ ne ákud metake áyāl e Krístæ. ³⁰ Syánē de-wane nzum á yāl e nkalaḡ mí bwām bōōb. Melem-lem mé nzum míme nyénnyínnē nwane' mōó rídii ríwanéé bōōb.

2

Paale ad abé adēd abē nêḡgáne áde Krístæ

¹ Abé áde nyédíí nhóg ne Krístæ áwédé nyé nlém á abum, échē edaḡge-'ε épwiitad nyé nlém á abum. Nyédé nlatén ne Edáadḡḡ éche Esáá. Nyélúmte' e'boḡ bé nlém, nyêwóó-'ε nlém rí ngol ne nhóg ne aníníí. ² Mmēm menyḡḡe mélōn mbon nzé nyêwóó mewêmtεν mehóg, nyélúmte melemlem mé edaḡge ne nhóg ne aníníí, nyêwóó nlém nhóg, nyédé-'ε nêḡgáne mod nhóg áyāl e kéchéé éche nyébeleé. ³ Nyéebēlē mekan míme mélúmte bán échen yāl chēn chōó nyéhēdtéé bwām. Nyéebēlē mekan míme mélúmte nén bán nyédé kúmbe. Boḡ ne asuded á yāl, nyényín bad bémpeē etógnén tómaa échen yāl. ⁴ Nyéebēlē mekan míme mépiinad nyé bēn pēn nsyáḡ, boḡ pēn nyébele káḡḡne mekan míme méwōḡgan káḡḡne bad bémpeē. ⁵ Mewêmtεν nímēn mébē nêḡgáne míme Yesu Krístæ mémbeē.

⁶ Abédé nyaa eche Dyõb ádíí,

boŋ kénê, enkênwónǵé mewêmtæn nén aá
móchəgned nén móō bó Dyõb bétáá.

⁷ Enkëntédte yǎl etógnén,
boŋ ambël eche yǎl nêngáne mbəlede,
bénchyāā-ε mó née moonyon.

⁸ Ade ábédé née moonyon, ansudéd eche yǎl,
ákwentén-ne awé.
Ankwentén áwé káəŋ ne kwééd e awəg.

⁹ Né-ó, Dyõb dēmbě mó etál éche étómténé achab
ámīn,
ábē-ε mó dīn áde átómé mīn mésyāāl.

¹⁰ Dyõb dēmbël nén ábel boŋ á dīn áde Yesuε,
nhəgtéd n̄syāāl n̄bwəg mebóbōŋ,
ké nhəgtéd n̄me n̄dé á nkoŋ n̄mīn, á nkōŋ n̄sé,
ké'ε á mbwəg e baásē.

¹¹ Moosyāəl áhōb aá Yesu Kr̄stəə mó adé Sāŋgwéé,
ábel Dyõb Titée ákud edúbé.

Nyébê átintê e bad ngáne tintins

¹² A-baányan bé edəŋge, ngáne nyéyógké'áá
mekan abel n̄me Dyõb áhóbé aá nyébel áde n̄bédé
ne nyé, édé etógnén bwāmbwam bán nyébel
mekan n̄me áhóbé aá nyébel, bəəb áde méesaá
ne nyé. Nyéwōŋ mbwəg n̄ Dyõb áte nyésuded-te
yǎl á'sō é' Dyõb. Nyéwan áte bwāmbwam ábel
mekan n̄me Dyõb áhedéé, ábel boŋ e'soosōŋ
ábe nyékúdé, é'lōn mbon. ¹³ Nyébel nê áyāle
Dyõb ádé ne nyé pōndé ésyāāl, ábel nyéwōŋ
nlém ábel mekan mé bwām n̄mé áhedéé aá
nyébel, nyébenle-ε mó. ¹⁴ Nyébele' chōm ésyāāl
ésebán nyényonŋe áte, nyêpentan-ne. ¹⁵ Nyébele
nén ábel boŋ modmod eehóbé' aá nyêwóó atón
dé mbéb ké á hóg á yǎl, nyésāŋ-ε. Nén débël

nyēbē bān bé Dyōb ábe béewóo atón dé mbéb ké á hóg á yǎl, ábe bédé átínté e bad bé mbéb ábe bébele mbéb pónké ésyāal. Nyédé átínté echáb á nkōnsé-te nēngáne betintine ábe bépene'.
¹⁶ Nyébele nén akal áde nyékalé nkalan mímé mpeene' alongé áde déemaá'. Nzé nyébele nén mēbē kúmbe ne nyé á epun éche Krístə́ áπεé áyāle nén délūmēd bān awan áde nwané'áá áte ne ntū míme mbélé, béebóó'é. ¹⁷ Mēbē nēngáne nzam e mīn echē bésyógé amīn e nsón míme nyébeléé, nēngáne mendε, áyāle adúbe áde nyédúbpé. Nhele-se nkūd metake, nwé-'ε áyāle nkale' nkalan mí bwām melemlem ngáne nyémpē áyāle nyédúbpé mímé nkalan mí bwām. Bon kénê ndé menyinje mēwōgēn-ne nyé moosyāal menyinje.
¹⁸ Melemlem nē dōo nyémpē nyétāngéné menyinje awóg, nyéwógēn-ne mémpē menyinje.

Paale atelé t̄ngene Timotie bó Epafroditus

¹⁹ Nzé édé á ntii míme Sāngú Yesue, nwóo nlém álóm Timotie áwēn mwāmpīn mí pónké, ábel bon póle éche méwōgkē áyāl echēn, éwēd me nlém á abum. ²⁰ Meewóo'é modmod ampée née mó awē akoó mímé nlém awóh ádəh dé ábii ngáne nyédíí.
²¹ Nhóbe nén áyāle bad ábe bélyágé ásē échab yǎl chóo bétōntanné, béebeléé ngáne Yesu Krístə́ áhedéé aá bébel. ²² Nyé bēn nyébíí ngáne Timotie álúmté aá móbele nsón bwām. Abelé nsón ne me ákal nkalan mí bwām ngáne mwān ábeléé nsón ne sáá. ²³ Né-óó, nlyágé nlém meé mēlōm mó áwēn áde ményīnnē ngáne mekan mébēēnnē me.

²⁴ Ndúbpé-'ε nén meé Sāngwéé ábēl mwāmpīn mí pónké mmēn ámpē mépē áwēn.

25 Nnyíné nén mæé édé etógnén me âlóm awed mwãnyan Epafroditus áwēn. Abele nsón míme Krístæ ne me, awōngan-ne átángen bad ábe bétāngan nkalan mí bwám, mós-’aá abédé nēngáne mésénze míme nyélómé áwōngen me. 26 Awóó nlém áte bwāmbwam ânyín nyé moosyáál, anwóg-ke ndutul áde áwógé bán nyêwógé bán mōnkolé. 27 Edé mbále bán ankolé, ápōn-ne káan ne awé. Bon Dyōb dénwōg mós ngól, saá-kaá mwēmpen, Dyōb dénwōg mémpē ngól. Enkēnkwentēnné aá áwê ábel bon meénabpé abé á ndutul-té. 28 Né-óó, nwóó nlém áte bwāmbwam âlóm mós áwēn ábel bon nyéwōg menyinje ânyín mós ámpē, me-’ε ámpē meébūdē atag áte áyāl echēn. 29 Né-óó, nyébê menyinje ákob mós nken áyāle adúbpé Sāngwéé ngáne nyémpē nyédúbpé, nyébage-’ε bad nēngáne mós edúbé. 30 Nyébage mós edúbé áyāle ampon awé, abé-’ε á nsal ní son abele áde ábenléé Krístæ. Ambel nén ábel bon áwōngen me ábel nsón míme nyébēn nyéehēle’ aá-se nyébel.

3

Bad ábe bédúbpé Yesu bóó békobnad á’sō é’ Dyōb

1 Asóged a-baányan, nyébê menyinje abé áde nyédíí mod nhóg ne Sāngwéé. Eetagtéé me átele nyé mekan míme ménsēbēē nyé atele. Nén ádíí ákæa nyé. 2 Nyétéd pón dé ne ábê e’bébtéd é’ bad. Echê mbwé, bad ábe béhóbe bán bétāngéné mod ayag. 3 Syánē-éε báyágé nyaa echē etāngéné. Edáédān éwōngan syánē ábe Dyōb edúbé ngáne débēnléé mós. Syánē dedé menyinje ngáne dedíí

ne Yesu Krīstəə. Debíi bán baányonj béehelée-se béwōngēn syánē. ⁴ Kénê mmēn nwóó nzom ályág nlem á yǎl e mekan mé moonyonj. Kénzée átínté echēn awě awémténé aá mówóó nzom ásum nlem á yǎl e mekan mé moonyonj né nwóó nzom tómaa nē. ⁵ Ade béchyáá me bēn'yǎg me ámbíd e epun saámbé. Ndii mod a Israel awě abídé á túmbé e Benjamin. Echem sánj ne nyanj bébédée bad bé Hibru. Mbédée mod a Farisia, ríhídē mbéndé ngáne éhóbée. ⁶ Menwónj kán áte bwámbwam nyaa echē nē dēmbenlé rítágté elad é bad bé Krīsto. Modmod eéhele'aa-se ahób aá nwóó atón dé mbéb ké ahóg áyāl, áyāle nhídé'aa mbéndé é bad bé Israel ésyāāl. ⁷ Bonj abē bwēm é'syāāl abe rínyíné'aa nēe nsyánj béesaá dyam dé abelen bəəb, áyāle chōm éche Krīstəə abénlé me. ⁸ Saké nē dēmpen, nnyíne chōm ésyāāl meé éesaá dyamdyam nzé nhǎgténé chó ne ndále e dyam echē edé ábíi Yesu Krīstəə, awem Sánjgwée. Áyāl échē chōm esyāāl éesaá dyam dé abelen, nnyíne-'e chó nēngáne mbinde ábel bonj mbíi Krīstəə, ⁹ mbê-'e mod nhóg ne mó. Saké ahíd á mbéndé dósó akáá bonj ríkobnéd á'sō é' Dyōb. Bonj nkōbnédé á'sō é' Dyōb áyāle ndúbpé Krīstəə. Dyōb-paá abélé bonj ríkobnéd áwe e'só áyāle ndúbpé Krīstəə. ¹⁰ Ndəá meé mbíi Krīstəə ríwōn-'e ngine echē ánwōngē áde ámpuú'é. Ndəá meé mbê ríkude metake melemlen ngáne ánkudté. Ndəá-'e meé ríkud metake ngáne ánkudté káənj béwúu me ngáne bēnwūú'é mó. ¹¹ Nlyágé nlem nēn meé mímén mésyāāl mébenléd ábel bonj Dyōb ápuud me ámbíd e kwééd echēm.

*Paale ad mowane áte
ápid mam á asóg bwám*

¹² Meehóbéé nén meé mmaá rímén mekan amad ké'ε meé mmaá atyéem á menzii mésyāāl. Boη ndii nwane áte âbé nyaa e mod echě Yesu Krístəə áhédé'áá aá mbê áde ápwédé με. ¹³ A-baányan, meehóbéé nén meé mmadé chōm ésyāāl. Boη dyam ahóg áde mbελεέ ádíi, áchatεn mekan míme métómé ámbíd ne áwan áte áhíd mekan míme méhúε' á'sō. ¹⁴ Ndii nwane áte áke á'sō kóōη nípe wée rítáηgéné asóg âbel boη níkud nsábe míme Dyōb ábánnédé με ádyōb. Achênle με aá níke ádyōb mbwiined ne Yesu Krístəə.

¹⁵ Syánē moosyāāl awě demaá akwōg á adúbe tē déwále rímén melemlen mé mewēmtεn tāηgene rímén mekan. Boη nzé édé bán nyéwóó mewēmtεn mémpēe tāηgene rímén mekan, né Dyōb déwōηgēn nyé ásoηtεn mó bwām. ¹⁶ Kénê-ε detāηgéné déhídē mekan míme syánē démáá abii.

¹⁷ A-baányan, nyéladtεn nyébē nyéhíde rímēm mekuu, nyénōne-ε bad ábe bébele ngáne nyényínnē ngáne sébéláá. ¹⁸ Nkänlé'áá nyé ngen ne ngen, bōob-pe ámpē nlāηge nyé ne mésōd tāηgene bad híin ábe rímāb mbeltéd rílūmtéé nén bán bédé bad bé ekōyí tāηgene nkalan míme ríhóbe kwééd eche Krístəə áwédé á awōg. ¹⁹ Echén ndín é bad ádab asóg ádíi dū á muú. Chōm éche ékamlan bó édii mekan mé esíi mé ekob é yāl. Bédáá âbel mekan míme bétāηgéné békwāgne. Mekan mé nkōηsé mēmpεn-naá békamtanné. ²⁰ Boη syánē pεn dedii bad ábe echab mbwōg édii ádyōb. Desine-ε awesyánē Nsoode, Sāηgú Yesu Krístəə bán ábid ádyōb átim ámbíd á nkōηsé. ²¹ Ábenléd eche ngíne eche ábenladté ákamlen chōm ésyāāl, áhāηlen échesyánē yāl é nkōηsé, yāl

éche éewóo ngíne, âbel boŋ dékud ndale é yǎl ngáne ânkudté áde Dyöb dêmpuúdté mó.

4

Paale abagé elébé

¹ A-baányan, ndáá nyé anyín ámpē áyāle ndáá nyé bwāmbwam. Nyébelé ndé menyiŋge nyédé-’ε nêŋgáne nsábe nímêm áyāl e nsón míme mbéle. Né-óó, a-baányan bé edaŋge, nyébê nyésuŋ mekuu tãŋgene adúbe áde nyédúbpé Sãŋgwéé.

² Ncháa nén meé Yudia bó Sintike bébê á nchemten áyāle bó bad bébe bédii baányan bé Krísto. ³ Nlãŋge wémpē, awem nsón a nsón awě nlyágé nlém áyāl, nhede meé éwõŋgen ábén bebaád ábé nsaŋ. Ábén bebaád bébe, Klemene ne bad bé nsón bémpēe bébéde me benben. Syáábõó sébelé ntũ âbel boŋ ríhel nkalan mí bwâm akal. Mmab mĩn mésyāāl méde á kálag e alonjé. ⁴ Nyébê menyiŋge pónde ésyāāl áyāle nyédii bad ábe Sãŋgwéé. Nhóbe ámpē, nyébê menyiŋge. ⁵ Abé ádēn álúmed á’sõ é’ bad bésyāāl nén bán nyéchedne bad yǎl. Sãŋgwéé akwogé ape. ⁶ Nyéētāgē áte áyāl e dyamdyam. Boŋ pen áyāl e kéchéé éche étané nyé nyékãne Dyöb nén bán ábe nyé chõm éche nyétógnéné. Nzé nyékãne-’ε nyésāgnān mó. ⁷ Nzé nyébelé-’ε nê, Dyöb débēl nyébé nsaŋ, nsaŋ míme ríchábé amĩn tómaa ngáne baányan béhele bésõŋten. Mmēn nsaŋ méwõŋgēn nyé âbel boŋ nyéētāgē áte abé áde nyédii bad ábe Yesu Krístā.

⁸ Asóged a-baányan, nyékamtan ábén bwēm pónde ésyāāl. Nyékamtan kéchéé éche édé mbále, kéchéé éche ékwógnédé chõm éche ebóó, kéchéé

éche étánǵéné, kéchéé éche éewóo atón dé mbéb áyāl, kéchéé éche bad bétánǵéné adəŋ ne kéchéé éche nyényíné bán ébónǵéné nyé. Nyékamtan mekan míme mébóó bwâmbwam ne míme bad béhábéé bán mébóó. Echén ndín é mam chǒo nyétánǵéné ahé á mewêmtən-té pónǵé ésyā̄l. ⁹ Kéchéé éche ní'yáǵté nyé boŋ nyékōb-pe ne kéchéé éche nyéwóǵé áwê̄m ne éche nyényíné néé mbéle, nyébele chǒ. Nzé nyêbele nén, Dyōb, mó awê abage nsəŋ, äbē ne nyé.

Paale asáǵné n wōŋgen míme ákúde

¹⁰ Abé áde nídí mod awe Sǵngwéé, ábéle ndé menyínǵe bwâmbwam, áyāle kǒŋne á asóǵ nyélúmté bán nyêbōŋge με. Mbíí nén meé nyéwóo mewêmtən ábóo με pónǵé ésyā̄l, boŋ etál éebagnedéé nyé ábel áned. ¹¹ Meehóbéé nén áyāle ntóǵe' chǒm. N'yáǵké ákob kéchéé éche étané με á alongé. ¹² Mbíí ngáne mod ábáǵkē ésebán awóo chǒm éche átóǵnéé, mbíí-'ε ngáne ébāǵkē mod ábud dé awóŋ chǒm éche átóǵnéé. Mmǽnténé ákob kéchéé éche étané με. Mmǽnténé abé áde mbúde chǒm éche nídyáǵkē awóŋ, mímentén-ne ádyεε nzaa. Mmǽnténé ábé áde níwóo tómaa ngáne nítoǵnéé, mímentén-ne abé áde méewóo'é chǒm éche nítoǵnéé. ¹³ Kéchéé éche étáne με, ngíne eche Krístəə ábageé με ébēl métōm chǒ áte.

¹⁴ Nyêbelé bwâm áwōŋgen με áyāl e mímê̄m metake. ¹⁵ Nyé bad bé Filipi nyêbíí bwâm nén bán áde mbóótédé nkalaŋ ní bwâm akal áde mbíde á Masedonia, nyé bēnpən-εé nyêbedé mwembé míme ménwōŋgēn με. ¹⁶ Ké áde mémbeē á dyad á Tesalonika, nyênlómé με nwōŋgen ngen ne ngen. ¹⁷ Meehóbéé nén áyāle nhede meé nyélómme

me nde. Bon nhede meé rínyíne' ngáne Dyöb ánamtéé nyé anamed ne anamed. ¹⁸ Nkudé chöm ésyāāl éche nyékélōmēē me, ríkūd-te ké tómaa nê. Epafrodituse ampiinéd me bwēm ábe nyénlōmēē me. Edíi byánán nyēbagé Dyöb nde eche ewóó elod é bwâm. Dyöb ákóbé nímē mendē, mébóhnedé-'e mó. ¹⁹ Adēm Dyöb débě-'e nyé kéchéé éche nyétógnéné átínté e nímē nkúú mé nhon, mbwiined ne Yesu Krístā. ²⁰ Ehúmé ébê ne ádeD Dyöb, awêd Titée á ngíndé ne á ngíndé. Ebê nê.

Melentēn mé asóg

²¹ Nyéleled bad bé Dyöb bésyāāl ábe bédúbpé Yesu Krístā. Abesyánē baányan ábe bédé ne me bélómmé nyé melentēn. ²² Bad bé Krísto bésyāāl bélómmé nyé melentēn, bwâmbwam abum á ndáb áde Kaisēē. ²³ Nsimé níme Sánjú Yesu Krístā mbê ne nyé moosyāál.

Mel̃ Mékō̃lē
New Testament in Akoose (CM:bss:Akoose)

copyright © 2011 Wycliffe Bible Translators, Inc.

Language: Akoose

Translation by: Wycliffe Bible Translators, Inc.

Akoose

bss

Cameroon

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Akoose

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 21 Feb 2024 from source files dated 29 Jan 2022

0143729f-907e-5098-b6ce-63b1629b8e48